

Manon Antoniazzi

Prif Weithredwr a Chlerc y Senedd
Chief Executive and Clerk of the Senedd

29 Ionawr 2024

Mark Isherwood AS
Cadeirydd y Pwyllgor Cyfrifon Cyhoeddus a Gweinyddiaeth Gyhoeddus
Senedd Cymru

Annwyl Mark,

Adroddiad y Pwyllgor Cyfrifon Cyhoeddus a Gweinyddiaeth Gyhoeddus ar Graffu ar Gyfrifon 2022-23.

Rwy'n ysgrifennu mewn ymateb i adroddiad y Pwyllgor Cyfrifon Cyhoeddus a Gweinyddiaeth Gyhoeddus ar Graffu ar Gyfrifon 2022-23. Hoffwn ddiolch i'r Pwyllgor am ei waith craffu.

Mae'r Comisiwn yn nodi barn a sylwadau'r Pwyllgor ynghyd â'ch argymhellion o ran y Comisiwn. Rydym wedi rhoi sylw i'r rhain yn yr Atodiad ynghlwm. Os hoffech gael rhagor o wybodaeth am unrhyw fater a gynhwysir yn yr Atodiad, mae croeso i chi roi gwybod i mi.

Hoffwn achub ar y cyfle hwn i roi sicrwydd i'r Pwyllgor ein bod yn parhau i fod mor ymrwymedig ag erioed i ddarparu mwy o eglurder a sicrwydd drwy waith craffu ac archwilio allanol, yn ogystal â thrwy ein fframwaith llywodraethu mewnol. Mae'r Comisiwn bob amser yn ceisio gweithredu mewn ffordd agored, dryloyw a chlrir.

Yn gywir,



Manon Antoniazzi

Prif Weithredwr a Chlerc y Senedd / Chief Executive and Clerk of the Senedd

Croesewir gohebiaeth yn Gymraeg neu Saesneg. We welcome correspondence in Welsh or English.



Senedd Cymru
Bae Caerdydd, Caerdydd, CF99 1SN

 Contact@senedd.cymru

 0300 200 6565

Welsh Parliament
Cardiff Bay, Cardiff, CF99 1SN

 Contact@senedd.wales

 0300 200 6565

Atodiad 1

Adroddiad y Pwyllgor Cyfrifon Cyhoeddus a Gweinyddiaeth Gyhoeddus ar Graffu ar Gyfrifon 2022-23.

Argymhelliad 1. Dylai'r Comisiwn sicrhau bod gan y Pwyllgor y wybodaeth ddiweddaraf am y cynnydd o ran gweithredu prosiectau fel rhan o'r Strategaeth Carbon Niwtral cyn i'r Pwyllgor graffu ar Gyfrifon y flwyddyn ariannol nesaf, gan gynnwys gwariant fesul prosiect, y cynnydd hyd y pwynt hwnnw ac arwydd o unrhyw orwariant neu danwariant.

Derbyniwyd

Rydym yn croesawu gwaith craffu'r Pwyllgor a'i gais am ragor o wybodaeth am gynnydd y Comisiwn wrth roi prosiectau ar waith fel rhan o'r Strategaeth Carbon Niwtral. Byddwn yn sicrhau bod y Pwyllgor yn cael adroddiad sy'n ymdrin â gwariant fesul prosiect, y cynnydd hyd yma ac unrhyw arwyddion sydd gennym o orwariant neu danwariant fesul prosiect cyn craffu ar Gyfrifon Ariannol 2023-24.

Argymhelliad 2. Dylai'r Comisiwn roi diweddariadau bob chwe mis i'r Pwyllgor, gan ddechrau yng ngwanwyn 2024, ar gynnydd y Strategaeth Ffyrdd o Weithio a'r adnoddau sydd wedi'u dyrannu i gyflawni'r prosiectau sy'n gysylltiedig â'r Strategaeth.

Derbyniwyd

Rydym yn cytuno i roi'r wybodaeth ddiweddaraf i'r Pwyllgor ddwywaith y flwyddyn ar gynnydd y rhaglen Ffyrdd o Weithio, gan gynnwys manylion yr adnoddau a ddyrannwyd i'r prosiectau sydd i'w cyflawni. Byddwn yn darparu ein hadroddiad cyntaf yn ystod y gwanwyn 2024.

Argymhelliad 3. Fel rhan o'r Adroddiad Blynyddol a'r Cyfrifon, dylai'r Comisiwn ystyried cynnwys amcangyfrif o'r tebygolrwydd y bydd risg yn codi, er mwyn llywio ystyriaeth well o broffil risg y Senedd yn y dyfodol.

Derbyniwyd

Nodwn gais y Pwyllgor, a byddwn yn sicrhau bod gwybodaeth am yr amcangyfrifon o'r tebygolrwydd y bydd risg yn codi yn cael ei chynnwys yn yr Adroddiad Blynyddol yn y dyfodol.

Argymhelliad 4. Dylai'r Comisiwn roi'r wybodaeth ddiweddaraf i'r Pwyllgor am waith y grwpiau sy'n edrych ar rôl Deallusrwydd Artiffisial yn y Senedd cyn i'r Pwyllgor graffu ar y Cyfrifon ar gyfer 2023-24.

Derbyniwyd



Cytunwn i roi'r wybodaeth ddiweddaraf i'r Pwyllgor am waith y grwpiau sy'n edrych ar rôl Deallusrwydd Artiffisial yn y Senedd cyn i'r Pwyllgor graffu ar y Cyfrifon ar gyfer 2023-24. Byddem yn awgrymu y gallai'r diweddariad hwn elwa o sesiwn frifio i aelodau'r Pwyllgor rannu'r wybodaeth y gofynnwyd amdani. Pe bai'n well gan y Pwyllgor gael adroddiad, byddwn yn sicrhau bod hwnnw yn cael ei ddarparu cyn y sesiwn graffu nesaf hefyd.

Argymhelliaid 5. Yn y dyfodol dylai'r Comisiwn ystyried rhoi cynlluniau recriwtio ar waith, fel rhan o'i Gynllun Gweithlu, er mwyn annog ceisiadau gan unigolion o amrywiaeth o gefndiroedd cymdeithasol-economaidd a daearyddol, a hynny er mwyn sicrhau bod y Senedd yn adlewyrchu'n well y wlad y mae'n ei chynrychioli. Byddai'r Pwyllgor yn gwerthfawrogi cael y wybodaeth ddiweddaraf am sut y gellid gweithredu hyn ac unrhyw dargedau sydd gan y sefydliad ar gyfer mynd i'r afael â'r anghydbwysedd presennol.

Derbyniwyd

Mae'r Comisiwn wedi ymrwymo i gyflawni amcan y Senedd o sicrhau bod y Senedd yn adlewyrchu'n well y genedl y mae'n ei chynrychioli.


Fel y cyflwynir yn [Adroddiad Blynyddol Amrywiaeth a Chynhwysiant 2022-23](#) y Comisiwn, dyma'r flwyddyn gyntaf i ni gasglu data ar y gweithlu, ac mae dwy flynedd ers i ni ddechrau casglu data recriwtio yn ymwneud â chefnidir economaidd-gymdeithasol, ac felly mae'r cyfresi data yn dechrau dod i'r amlwg. Mae'n werth nodi mai dim ond ychydig o dan hanner gweithlu'r Comisiwn (47%) a ddatganodd ei gefndir economaidd-gymdeithasol; mae hyn yn cymharu â chyfraddau ymateb o 90% ar gyfartaledd ar gyfer y nodweddion gwarchoddedig. Mae'r wybodaeth sydd gennym yn rhoi data sylfaenol i ni, a byddwn yn parhau i ganolbwyntio ar ddatblygu cyfresi data cyfoethocach i ddarparu craffter mwy soffistigedig o ran proffil daearyddol ac economaidd-gymdeithasol ein gweithlu. Bydd y dadansoddiad o ddata amrywiaeth cynhwysfawr ar ein gweithlu ar gael yn yr Adroddiad Blynyddol Amrywiaeth a Chynhwysiant 2023-24 sydd i'w ystyried gan y Comisiwn yn nhymor yr haf ac a gaiff ei roi i'r Pwyllgor wedi hynny.

Yn ddiweddar, mae'r Rhaglen Ffyrdd o Weithio wedi sefydlu dau grŵp llywio ar gyfer y Gweithlu ac ar gyfer Amrywiaeth a Chynhwysiant yn y drefn honno. Mae cael gafael ar gyfresi data cyfoethocach a mwy cyflawn yn ffocws i'r ddau grŵp hyn, a fydd yn gweithredu yn gydnaws â'i gilydd. Yn sgil y grwpiau llywio hyn, byddwn yn gallu datblygu ein strategaeth ddenu ymhellach, i annog ymgeiswyr o amrywiaeth eang o gefndiroedd economaidd-gymdeithasol a daearyddol i ymgeisio am rolau yn y Comisiwn. Mae'r Comisiwn yn cytuno y gwnaiff roi unrhyw fewnwelediadau perthnasol ynghylch data i'r Pwyllgor wrth iddynt ddod i'r amlwg.


Er hwylustod, dyma'r data economaidd-gymdeithasol a geir yn [Adroddiad Blynyddol Amrywiaeth a Chynhwysiant 2022-23](#):



Graff 10: Cefndir economaidd-gymdeithasol y gweithlu



Graff 11: Gradd a chefnidir economaidd-gymdeithasol



Argymhelliad 6. Dylid rhannu'r Cynllun Gweithlu ac unrhyw allbynnau o'r Fframwaith Adnoddau Tymor Canolig â'r Pwyllgor cyn gynted ag y byddant ar gael, er mwyn sicrhau ein bod yn cael y wybodaeth ddiweddaraf am gynlluniau'r Comisiwn yn y dyfodol o ran Diwygio'r Senedd ac o dan y Strategaeth Ffyrdd o Weithio.



Derbyniwyd

Rydym yn cytuno i roi'r wybodaeth ddiweddaraf i'r Pwyllgor am allbynnau, pan fyddant yn codi a chyn y sesiwn graffu flynyddol yn hydref 2024, i sicrhau bod y Pwyllgor yn cael y wybodaeth ddiweddaraf am gynlluniau'r Comisiwn ar gyfer y dyfodol o ran Diwygio'r Senedd, ac o dan y Strategaeth Ffyrdd o Weithio.

Argymhelliad 7. Dylai'r Comisiwn nodi sut y mae'n bwriadu ystyried safbwyntiau'r Aelodau a'u staff fel rhan o'r gwaith cynllunio ar gyfer y dyfodol o dan y Strategaeth Ffyrdd o Weithio ac unrhyw ffrwd arall o waith sy'n mynd i'r afael â goblygiadau Diwygio'r Senedd.

Derbyniwyd

Mae'r Comisiwn wedi ymrwmo i sicrhau bod safbwyntiau'r Aelodau a'u staff yn cael eu hadlewyrchu yn y strategaeth Ffyrdd o Weithio ynghyd ag unrhyw ffrydiau gwaith eraill sy'n rhoi sylw i oblygiadau Diwygio'r Senedd. Byddwn yn ceisio cael dealltwriaeth o'r safbwyntiau hynny drwy'r grwpiau a'r gweithgareddau ymgysylltu a ganlyn.

- **Prosiect Siambr 2026** - Ceisir ymgysylltu a chael barn drwy grŵp cyfeirio Aelodau (ynghyd â'r Comisiwn) ar gyfer y prosiect hwn. Gweithredodd y Llywydd ac un o'r Comisiynwyr fel sylwedyddion yn ystod proses gaffael ar gyfer gwasanaethau pensaernïol gan roi sicrwydd bod y safbwyntiau'n llywio canlyniad y prosiect.
- **Prosiect Tŷ Hywel 2026** – Ceisir ymgysylltu a chael barn drwy grŵp defnyddwyr Aelodau a grŵp defnyddwyr y Pennaeth Staff. Bydd y Comisiynwyr hefyd yn ymgysylltu â'u pleidiau i ddeall eu safbwyntiau ac yn darparu'r safbwyntiau hynny i Fwrdd y Prosiect.
- **Prosiect Bae Caerdydd 2032** – Y Llywydd / Arweinyddion grwpiau dwyblaid fydd y prif bwyntiau ymgysylltu â'r Aelodau a'u staff ar y cam cynnar hwn o'r prosiect. Bydd y Comisiynwyr hefyd yn ymgysylltu â'u pleidiau i ddeall eu safbwyntiau a byddant yn darparu canlyniad y sgysiau hynny i Fwrdd y Prosiect.

Bydd lefelau a dulliau ymgysylltu yn newid wrth i'r prosiectau fynd drwy'u camau cyflawni. Caiff hyn ei fonitro a'i addasu i ddiwallu anghenion camau pob prosiect, a chaiff ei adolygu i sicrhau bod ymgysylltu llwyddiannus yn digwydd. Yn ogystal ag ymgysylltu i gasglu gwybodaeth a safbwyntiau, bydd adborth ac ymgysylltu a chyfathrebu achlysurol ar adegau allweddol o'r prosiectau.

